

RES
BOOK AREA
M205.5
H464TAH
V16
no 12
1922

TE HAHURAA API

I neia i te piha neneiraa no te Ekalesia a Iesu Mesia i te Feia
Mo'a i te Mau Mahana Hopea Nei i Papeete, Tahiti,
i te mau fenua Sotaiete, i te mau avae atoa.
Te hoo e piti farani i te matahiti hoê.

Nu. 12.

Ditema, 1922.

Mat. 16.

*"E faatura'tu ia Iehova i ta oe ra mau tao'a rarahi, e te
oho matamua o ta oe atoa ra tao'a i tupu; e i roa ta oe ra mau
fare vairaa tao'a i reira, e i hoi ta oe mau farii uaina i reira
e manii noa'tu."* Maseli 3:9-10.

Te Ture No Te Tufaa Ahuru.

Mai te au i te parau na te Atua, ua faatiahia te mau haamaitairaa'toa i nia iho i te tahi ture, e e noaa ia tatou te haamaitairaa na roto i te haapaoraa i taua ture ra. Ua noaa a nei ia tatou te fraa o te mau haamaitairaa a te Atua? Mai te mea e, te toe nei te tahi mau haamaitairaa i titau-noa-hia e tatou, te ravea tano ia, ia imi tatou i te ture no te reira, e na roto i te haapaoraa i te ture, e noaa ia tatou te haamaitairaa ta tatou i hinaaro.

E ture tahito roa ia te Tufaa Ahuru, e ua rahi roa te mau haamaitairaa i faatiahia i nia iho. Ua haapao Aberahama i taua ture ra, mai te aufau atu i te tufaa ahuru o ta'na tao'a'toa ia Melehizedeka. E no te tufaa ahuru ia ta Iakoba parau faaau matamehai i te Atua. Ua eue ihora oia, na ô atura: "e e riro teie nei ofai ta'u i faatia iho nei ei pou ra, ei fare no te Atua; e te ahuru o te mau mea'toa ta oe e ho mai na'u nei, e hopoibia ia e au na oe." Genese 28: 22.

Ua ite hoi to Iseraela e hope roa'e i taua ture nei; aita â te taatoaraa o ratou i haapao maitai i te reira, e faahapa ihora te Atua ia ratou na roto i ta'na peropheta ra ia Mala-

ki no to ratou tamau-ore-raa i te aufau i te tufaa ahuru.

Ua faahapa atura Iesu i te mau papai parau e te mau pharisea no to ratou haapaeraa i te aroha e te parau-tia, e parau atura oia ia ratou, "e eiaha atoa e haapaehia" te horoaraa i te tufaa ahuru. Ua haapao atoa to te ati Nephi ita-ua ture ra i nia iho i te fenua Amerika i to ratou anotau.

E ture mau ia te Tufaa Ahuru na te Atua; e na'na iho e faautua mai i te taata tei haapao, e ia'na hoi tei ore i haapao. Na ô atura te Atua i to Iseraela: "Hopoi mai na outou i te ahuru atoa o te mau tao'a i roto i te fare vairaa ia maa hia tau fare nei." Malaki 3:10. E parau atura Paulo i to Hebera, "To te tamarii a Levi ra, tei noaa ia ratou te toroa tahu'a ra, ua parau-mau-hia mai ratou e, e rave i te ahuru o ta te taata ra tao'a, i tei au i te ture ra." Hebera 7:5.

Teie hoi te heheuraa i horoahia mai na roto i te peropheta ra ia Iosepha Semita:

"Oia mau, te na ô maira te Fatu, te titau atu nei au i ta ratou atoa tao'a i hau atu ia tuuhia i roto i te rima no te episekopo no ta'u Ekalesia i Ziona, no te paturaa i ta'u fare, e no te haamauraa te niu i Ziona, o te haamataraa hoi teie no te ahururaa a to'u ra mau taata: e i muri a'e i te reira, o taua feia o tei horoa i te ahururaa ra, a aufau ratou i te mau matahiti atoa i te ahuru no te tupu-rahi-raa o ta ratou atoa ra mau faufaa; ei ture tamau te reira na ratou e a muri noa a'tu, na to'u ra au tahu'a mo'a, te na reira maira te Fatu.

"Oia mau e parau atu vau ia outou, e tupu teie o te feia atoa o te haaputu mai i te fenua i Ziona e ahururaa i ta ratou ra tao'a i hau, e haapao hoi ratou i teie nei ture, aore ratou a tihia ia faaea i rotopu ia outou. E te parau atu nei au ia outou, ia ore to'u ra mau taata ia haapao i teie nei ture, e ia haamo'a i te reira, na teie nei ture te haamo'a mai na'u i te fenua ra i Ziona, ia haapao te reira ta'u ra mau faaneraa e ta'u ra mau ture, ia riro ei mea mo'a roa, inaha, oia mau ta'u e parau atu ia outou nei, e ore ia e riro ei fenua no Ziona ia outou; e riro hoi teie ei hi'oraa na te mau tîti atoa i Ziona. Oia mau ia. Amene." Buka Fafau S. 106.

I roto i taua heheuraa nei, ua pāpū roa te mau parau e te mau vahi atoa no te ture; e te auraa no te parau tufaa ahuru, o te ahuru ia o te tufaa no te mau faufaa e hope roa a'e tei noaa ia tatou; mai te mea e moni, te reira ia; mai te

mea e faufaa no nia mai i te faaapu, te reira ia; e mai te mea e faufaa no roto mai i te miti, te reira hoi ia.

Te Mau Haamaitairaa i Parauhia.

Na roto i te haapaoraa i te ture tufaa ahuru, e riro ai tatou ei hoarave ohipa mau no te Fatu, e riro hoi ta te Atua mau haamaitairaa ei moni taime e e moni apîna nia i ta tatou i aufau ra. No ta lakoba haapaoraa i ta'na i faaau i te Atua, manuïa rahi roa ihora oia i te pae tino e te pae varua atoa. Noa'tu râ te taata, mai te mea e tamau oia i te aufau i ta'na tufaa ahuru i te Atua, e manuïa oia i ta'na mau ohipa e te mau opuaraa parau-tia no te pae tino nei.

No te faufaa rahi o te parau a te Peropheta ra a Malaki, ua tapiti atura Iesu i taua parau ra i to te ati Nephi ra, mai te faaite atu ia ratou e, o te parau iho â ia a to'na Metua i e ao ra; e faaue atura oia ia ratou ia haamana'o e e haapao hoi i taua ture ra, e e noaa ia ratou te mau haamaitairaa e au ai i tera mahana e i tera mahana. Na ô atura oia ia ratou: "Hopoi mai na outou i te ahuru atoa o te mau tao'a i roto i te fare vairaa, ia maahia tau fare nei, e tamataraa te reira ia'u nei, te parau maira Iehova sabaota ra; i te oreraa vau i te iritiraa i te mau haamaramama o te ra'i ra, a ninii atu ai i te tao'a rahi roa ei maitai no outou. E no outou e a'o atu ai au i te amu ra, e eiaba oia e amu i te maa o to outou fenua, e ore hoi ta outou vine e auparahia i to outou fenua, te parau maira Iehova sabaota ra." Malaki 3:10-11; Buka a Moromona, Nephi III, 24:10-11.

E rahi noâ te mau haamaitairaa i parauhia no te pae tino nei, e haamaitai-atoa-hia to tatou pae varua ia haapao tatou i te ture no te tufaa ahuru. Te na ô maira te Fatu, na roto i ta'na peropheta ra i te anotau hopea nei, "Inaha, ua parauhia e i nauanei, oia mau iho, e mahana faatusiaraa, e mahana aufauraa no te ahururaa na ta'u mau taata; ô tei aufau i te ahururaa, e ore ia e ama. I muri mai hoi i teie nei mahana o te amaraa ihora ia; te parauhia nei teie mai ta te Fatu ra parau; oia mau hoi te parau atu nei au e, ananahi te feia teoteo e te feia rave hara atoa ra e riro ai mai te aihere ra; e tutuihia hoi ratou e au, o te Fatu hoi au no te mau nuu ra; e ore hoi au e faaherehere i te hoê o te faaea i Babu-

lonia.” Buka Fafau 64: 23-24.

E riro hoi ia to tatou haapaoraa i teie nei ture ei paruru na tatou “a tae atu ai i taua mahana rahi mata’u a Iehova ra.” Ua tuuhia te mau oroa no te hiero o te Fatu ia ratou hoi, tei tamau i te aufau i ta ratou tufaa ahuru.

Te Mau Utua no te Haapao Ore.

Te taata hoi tei ore i haapao i taua ture tufaa ahuru nei, ua faaitohia oia ei taata haru i roto i te parau na te Atua.

Te ui maira te Metua e, “E haru anei te taata nei i ta te Atua? Ua haru maira outou i ta’u ra. Te parau nei râ outou, I haru matou i ta oe i te aha? I te ahuru o te tao’a ra e te mau ô. Ua roohia-mau-hia outou e te ino, ua haru mai hoi outou i ta’u, o te fenua taatoa nei â.” Malaki 3:8-9.

E ere anei ia i te mea tia, ia haapao tatou e ore ai e tia i te Atua, e aore râ i te taata nei, ia parau e, ua haru mai oe i ta’u?

Eita e faatiahia ia tomo mai te taata patoi i te ture no te tufaa ahuru i roto i te Ekalesia a Iesu Mesia. Te na ô mai ra te Fatu, “Aita i au i te hinaaro e i te faaueraa na te Atua ia papaihia te i’oa no ratou tei ore i farii i ta’na ra ture, e tufaa-ahuru-hia’i to’na ra mau taata, i rotopu i to te feia no te Atua.” Buka Fafau 85:3.

Ua opani-roa-hia te hiero o te Fatu i te taata haapao ore i teie nei ture, e eita e noaa ia’na te faufaa e te mau haamaitairaa no te oroa mo’a e ravehia i roto ra. Teie hoi te tumu, no roto mai i te moni tufaa ahuru i patuhia’i te mau hiero no te Atua, e e ravehia’i te mau ohipa i roto, e eita e faatiahia ia tomote hoê noa iho taata i roto i taua mau fare mo’a ra, maoti râ uatauturu oia i te paturaa e i te faatere-raa; e maoti râ hoi te haapao nei oia i te mau ture atoa a te Atua.

E nafea te oroa a te Fatu? Ua au anei te taata te ore e haapao i te ture tufaa ahuru i te rave i te pane e te pape ei haamana’oraa i te Mesia ra? Ua parauhia oia e te Atua i te taata haru. Na ô atura Paulo i to Korinetia ra, “O tei amu hoi e o tei inu mate au ore ra, na amu ia e ua inn i te pohe no’na iho, oia aore i hi’o i te tino o te Fatu ra.” Korinetia 1, 11:29. Na roto i te pure oroa te faaau nei tatou i te hoê faufaa i mua i te aro o te Atua, e i mua i te amuiraa o te

Feia Mo'a. Te na ô mai ra te pure, "e ia faaite ratou ia oe, e te Atua, te Metua mure ore, e tia ia ratou i te rave i te i'oa o to Tamaiti i nia iho ia ratou, e i te haamana'o â ia'na e a muri noa'tu, *ma te haapao maitai i ta'na ra mau faaue ta'na i tuu mai ia ratou ra.*" O te tufaa ahuru ia te hoê o taua mau faaue i parauhia nei.

Ua riro te tufaa ahuru a te taata mai te mea ra e, e tarahu ia i te Atua; e e haapê noa te taata parau-tia i ta'na tarahu; area râ te taata te haavare i te Atua, e haavare atoa ia i to'na hoa taata nei. E manuïa roa te taata te tamau noa i te aufau i ta'na tufaa ahuru; e oti roa ia'na te haapêraa i ta'na mau tarahu i te taata nei; e roa ia'na te mau maitai e au ai i te mau mahana atoa; e e tupu oia i te faaroo puai e te parau-tia mau. Ua parau maira te Atua, "e tamataraa te reira ia'u nei; i te oreraa vau i te iritiraa i te mau haamaramama o te ra'i ra, a ninii atu ai i te tao'a rahi roa ei maitai no outou."

Tei ia tatou to tatou tiamâ, e tia'i ia rave mai tei au i to tatou iho hinaaro; area râ, tera ia te parau na te peropheta a te Atua i to tatou anotau, "Te vai ra te ture, i haamaubiai te ao ra hou te hamaniraa i teie nei ao, i faatiahia'i te mau haamaitairaa e hope roa'e; e ia noaa ia tatou tehoê haamaitairaa no te Atua, na roto ia i te hapao i te ture i faatiahia'i taua haamaitairaa ra." Buka Fafau 130:20-21.

Te hinaaro nei tatou i te mau haamaitairaa na te Atua.

Te hinaaro nei tatou i te tamau i te aau mâ e te parau-tia, e ia riro te fenua nei ei Ziona ia tatou.

Te hinaaro nei tatou ia manuïa ta tatou mau ohipa i te pae tino e te pae varua atoa hoi.

Te hinaaro nei tatou ia riro mau ei "te miti o te fenua nei"; "te maramarama o teie nei ao"; "e orie i faatiahia i nia i te mou'a ra"; e ia anaana ia to ratou maramarama i mua i te aro o te taata nei, ia hi'o ratou i ta tatou ohipa maitai, e ia haamaitai i to tatou Metua i te ao ra.

O te hoê ture ia te Tufaa Ahuru i faatiahia'i taua mau haamaitairaa i faaitehia nei; e na roto i ta tatou haapaoraa i te ture e noaa'i ia tatou te haamaitairaa.

Papaihia e Ole Petesona.

Hoê Ahuru ma Piti Tapao no te Ekalesia Mau

(I tuatihia teie nei parau.)

Tapao 8—Te Parauraahia o te Feia Toroa.

Ua parauhia te mau taata atoa o tei mau i te hoê a'e toroa i roto i te Ekalesia mau na roto i te heheuraa. O te reira te ravea no te Bibilia i parauhia'i te mau tavini a te Atua e rave i Ta'na ohipa. Te parauraahia o Aaron a ei vaha no Mose, o te ravea mau ia a te Atua i te paruraa i te mau tavini a te Atua. Te na ô mai ra hoi Paulo e, "E aore roa e taata e rave noa i teie hoi tura no'na iho, maori râ o tei parauhia e te Atua, mai ia Aaron a ra." Heb. 5:4. Ua parauhia Aaron a e te reo o te Atua na roto i te peropheta ra ia Mose. Exodo 4.

Ua parauhia e ua faatoroahia hoi te feia toroa i roto i te Ekalesia a Iesu Mesia i te Feia Mo'a i te Mau Mahana Hopea Nei na roto i te heheuraa. E ua faatoroahia ratou e te mau taata e mana to ratou, na roto i te tuuraa rima, ia rave ratou i te ohipa i roto i te i'oa o te Atua.

Tapao 9—Te Mana.

Tei roto i te Ekalesia mau te mana tei haamana i to'na feia toroa ia rave tamau ratou i te ohipa evanelia i roto i te i'oa o te Atua. Ua horoahia taua mana nei, oia hoi, te autahu'araa mo'a, e Iesu Mesia i to te Ekalesia tahito. Ua papai Mataio i ta te Fatu mau parau no taua mana nei, i te na ô raa mai e: "E e horoa'tu hoi au i te mau taviri o te basileia o te ao ra ia oe, e ta oe e haamau i raro nei, e haamau-atoa-hia ia i te ao; e ta oe e tuu i raro nei, e tuu-atoa-hia ia i te ao." Mataio 16:19.

Tei taua Ekalesia a Iesu Mesia i te Feia Mo'a i te Mau Mahana Hopea Nei te Autahu'araa Mo'a mau no te Atua. Ua horoahia taua mana nei i te Ekalesia nei e Petero, ratou o Iakobo e Ioane, na aposetolo tootoru a Iesu Mesia, o tei fâ mai i roto i teie nei ao i te matahiti 1829, e o tei faatoroa ia Iosepha Semita raua Olive Kauderi ei na peresibutero e ei na Aposetolo i roto i te Ekalesia a Iesu Mesia. Na roto i taua na peresibutero matamna ra no te Ekalesia i farii ai te mau taata toroa teitei o te Ekalesia i te Autahu'araa Mo'a a Melhizedeka.

Tapao 10—Te Mau Haapiiraa.

Tei taua Ekalesia nei te tapao ahuru no te Ekalesia mau. Te haapii nei ia i te parau mau i heheuhia mai no te Atua, te Mesia, te Varua Maitai, te taata, te hi'araa a te taata, te taraehara a te Mesia, te tia-fahou-raa, te haavâraa mure ore, te ora mure ore, te tumu no to te taata oraraa nei, to'na hopea, to'na faaearaa i te ao varua a muri nei, te opuaraa a te Atua no te ao nei e to'na hopea, e te mau haapiiraa i haapii-hia i roto i te mau parau papaihia a te Atua.

Tapao 11—Te Mana o te Atua.

Tei taua Ekalesia nei te mau horoaraa, te mau faaiteraa, e te mana hoi no te Varua Maitai ra; e te faaite-noa-hia ra taua mau mea ra e hope roa'e i roto i ta'na'toa ra mau raveraa. E te aratai-noa-hia ra to'na feia toroa e te ûrûraa e te heheuraa. Te faaitehia mai nei ia ratou te mau mea e tupu a muri atu na roto i te varua tohu. Na roto i ta ratou pure e te faatahinuraa, te faaorahia nei te feia ma'i. I roto i to ratou oraraa nei, te tamahanahanahia nei e te arataihia nei hoi te feia haehaa e te feia aau mâ no te Ekalesia e te varua faaite, te mau orama, te mau moemoea e te reo nainai o te varua. Mareko 16; 1 Kor. 12.

Tapao 12—To Tatou Hi'oraa i To te Ao nei.

E ere taua Ekalesia nei i te Ekalesia faaino. I roto i ta'na ohipa evanelia, te faaite pāpū nei te reira Ekalesia i te varua o te Mesia, tei faaite-nehenehe-hia na roto i te himene e: "Ia haamaitaihia te Atua i nia i te ra'i teitei, ei hau to teie nei ao, e ia ite auhia mai te taata nei." Luka 2: 14. "Ia ite auhia mai te taata nei", o te opuaraa ia o te mau tavini mau o te Atua. Aita ratou i faahapa. Aita ratou i tahitohito. I te mau taime atoa, te rave nei ratou i te ohipa maitai. Te tamahanahana noa atu nei ratou i te feia aau oto, e te faaitoito noa nei ratou i tei haamani-ino-hia, te haamaitai nei i te feia ma'i, te haamaramarama nei i te feia ite ore, e te pii hua atu nei i te feia hara ia tatarahapa.

Faaauhia ei reo Tahiti e

Reda Semuta Merila.

Te Ruri-ê-raa-hia o te Haapiiraa a te Mesia e te Taata i te Tau Hopea Nei

Te Haapiiraa a te Mesia

Amene, amene, e parau atu vau ia outou, o te faaroo mai ia'u ra e rave atoa oia i teie nei mau ohipa ta'u e rave nei, e e rahi atu â ta'na e rave i teie, no te mea te haere nei au i tau Metua ra. — Ioane 14:12.

Eiaha râ e mata'u atu ia ratou; aore roa hoi e mea tapo'i-hia e toe i te faaitehia; e aore roa e mea moe e toe i te itea. — Mataio 10:26.

E na'na e tonono i ta'na ra mau melahi ma te pu oto rahi ra, e na ratou e haaputu i to'na feia maitihia ra no na apoo mata'i e maha ra, mai te tahi pae ra'i e tae noa'tu i te tahi pae ra'i. — Mataio 24:31.

Hi'o atura vau i te hoê melahi i te maueraa na ropu i te reva nei: ma te evanelia e tia i te vairaa ra ei pororaa'tu i te feia e parahi i te ao nei ra, i te mau fenua atoa, e te mau opu atoa, e te mau re'o atoa, e te mau nunaa atoa. — Apokalupo 14:6.

Ia tae mai râ te Varua parau mau ra, na'na ia e aratai ia outou i te mau parau mau

Te Haapiiraa a te Taata

O oia tei faaroo i te Mesia ra, e ore roa'tu e tia ia'na ia rave i te hoê a'e semeio e te mau ohipa maere mai Ta'na i rave ra, no te mea e, ua faaorehia te reira.

Eita e horoa-faahou-hia te heheuraa, ua navai roa hoi tei heheuhia.

E ua faaore-roa-hia hoi te raveraveraa a te mau melahi.

Aore hoi te mau melahi i fâ mai i te taata i teie nei anoutau maramarama, aita hoi ratou i hinaarohia.

Aita e faufaa te ûrûraa mai o te Varua i teie nei tao paari rahi e te ite, eita atoa te

atoa ra; e ore hoi ta'na parau e riro na'na iho: o ta'na râ i faaroo ra, o ta'naia e parau mai, e na'na hoi e faaite mai ia outou i te mau mea e tupu a muri atura.—Ioane 16:13.

I ati mai outou ia'u, e ia vai maite tau parau i roto ia outou na, e ani noa ia outou i ta outou i hinaaro ra, e e ho-roahia ia ia outou. —Ioane 15:7.

Aore hoi au i pure ia ratou ana'e nei, i te feia atoa râ e faaroo mai ia'u i ta ratou ra haapiiraa.

Ia riro ratou atoa ei hoê; mai ia oe, e tau Metua i roto ia'u nei ra, e mai ia'u hoi i roto ia oe na, ia hoê atoa ratou i roto ia tâua, ia faaroo to te ao e na oe au itono mai. —Ioane 17:20-21.

I bapetizohia hoi tatou e te Varua hoê i roto i te tino hoê ra, te ati Iuda, e te Heleni, te tavini e te tiamâ, e ua faainuhia tatou i ta te Varua hoê ra.—1 Korinetia 12:13.

E aore roa e taata e rave noa i teie nei tura no'na iho, maori râ o tei parauhia e te Atua, mai ia Aarona ra.—Hebera 5:4.

varua e aratai ia outou i te mau parau mau atoa ra, o te riro outou ei peropheta, e aita roa hoi e peropheta faahou e tae mai i teie nei mau mahana.

Aita ia i na reirahia i teie nei mau mahana, eiaha tatou e mana'o e, ua tia ia tatou ia faaora i tei pohe i te ma'i, e rave i te mau semeio; e teie hoi, eiaha atoa tatou e mana'o e, e faarii tatou i ta tatou e ani.

E e mau Keretetiano maitai tatou paatoa, e te faaroo nei tatou atoa Ia'na na roto i ta te mau Aposetolo mau parau, noa'tu tatou i faataa-êhia i roto i te mau hanereraa o te mau haapaoraa.

E no te mau varua e rave rahi i hahae-êhia i tatou i roto i na tino êê e rave rahi.

E aore roa hoi e taata e rave noa i teie nei tura no'na iho, maori râ o tei haapii-maitai-hia na mua'e no te reira ohipa, e tei haamanahia e te taata nei.

Mau Parau Apî

No Te Mau Hau.

I te 9 no Atopa i mairi a'enei, ua tonono te hau Amerika i to'na pahi manuâ ra o "Utaha" i te miti Mediterenia i fatata i te fenua Turekia, e tauturu e e paruru hoi i te mau taata Amerika i reira. E tonono-atoa-hia te pahi manuâ ra o "Pittsburg" e tauturu i te "Utaha".

Ua faataahia te hoê tau faaearea i te tama'i i ropu i te hau Turekia e te hau Heleni, i te 11 no Atopa i mairi a'enei; e e haapaohia te tahi na apooraa i rotopu i teie nei na hau e te mau hau rarahi atu â, ei tamataraa i te faatupu faahou i te hau. Ua mana'ohia e, e manuâ hoi ratou.

A tauturu ai te hoê pahi manuâ no te hau Amerika i te mau titihoria no te hau Heleni e no te hau Aramenia, i te 4 no Atopa i mairi a'enei, ua pupuhi maira to te hau Turekia i taua pahi ra. Aita râ e peapea, ua ora te pahi e te mau taata atoa.

Ua tupu te orurehau i roto i te fenua ra i Italia, e faarue noa ihora te arii e te mau taata faatere hau i to ratou mau toroa. Haaputupu maira te mau taata orurehau i roto i te oire ra i Roma, mai te haru i te faatereraa i te hau, e ua tupu te tahi aroraa tama'i i ropu ia ratou e i to te hau tahito, e pohe roa'era na taata hoê ahuru ma piti.

Tera ia te parau apî hopea no te fenua papaa mai, oia hoi: i te mahana 3 no Novema nei, faarue atura te Sulatana (oia hoi te arii) no te hau Turekia i to'na hau, e na te mau taata iho â i haru i te faatereraa. Na teie nei mau mea i faaite papû mai i te tupuraa no te tohu a Daniela te pene piti no te pararîraa o te mau hau i te anotan hopea nei. I roto i te tama'i rahi i mairi a'enei ua itehia te pararîraa o te mau hau e rave rahi. Ua horo te emepera no te hau Eremania; na hurihia te emepera no te hau Ausaria; na taparahihia te arii no Rusia; ua faarue noa te arii no te hau Heleni i to'na faatereraa; ua horo noa te arii no te hau Bulagaria i te faatereraa i to'na mau taata; e te hopea ia te pararîraa o te

ariiraa no Italia e no Turekia. E te tupu noa nei te Basileia no te Atua ta Daniela i parau maira i teie nei â.

Tera ia te mana'o no na taata paari no te hau Amerika, o tei ho'i maira no te fenua Eremania mai; oia hoi, te tupu oioi noa ra Eremania i te maitai e te puai faahou; e i na matahiti e hoê ahuru a muri nei e puai a'e to'na ineineraa no te tama'i i to'na huru matamua i te matahiti 1914 i mairi a'enei.

Te mana'o noa ra te mau taata paari no te hau Beritane e, ia tupu faahou te hoê tama'i i rotopu i te mau hau, e faaterehia ia i roto i te reva; e no reira te opua noa ra ratou i te hamani i te mau pahi reva tama'i puai e te rahi i to te ao atoa nei.

No Te Mau Ati.

I te fenua ra i Texa, i Amerika, i te 17 no Atopa i mairi a'enei, ua mou te hoê pahi reva tama'i rahi roa i te auahi. Te opua ra ratou i te mau mai te tahi paeno te fenua Amerika e tae noa'tu i te tahi pae. I mua iti a'e i to ratou haamataraa, ua tamata ratou i te faatere i te pahi reva ia ite papû ratou e, ua maitai anei e aita anei. E i taua taime ihora i puta ai te pute mata'i, e tupu ihora te auahi. Pohe roa ihora te taata faatere.

Ua tupu te hoê puahi'ohi'o ino rahi i te fenua ra i Misouri i Amerika i té mahana hoê no Novema nei. Ua huri-noahia te mau fare, e pohe roa ihora te mau taata e rave rahi.

I te 30 no Atopa i mairi a'enei, tupu a'era te auahi i roto i te uru raau i te fenua ra i Tenasi, i Amerika, e aita roa i vî i te taata. Te amanoa ra ia i na mahana e maha ra, pau ihora te uru raau. Tera ia te faufaa tei moe i roto i taua auahi ra, oia hoi, \$ 100, 000.00 moni Amerika.

A tere noa'i te pahi auahi ra, "Oire no Honolulu", mai te fenua ra Hawaii i San Francisco, i Amerika, i te 13 no Atopa i mairi a'enei, ua tupu te auahi i nia i te pahi. Ua pii atura to ratou paraparau reva ia tauturu mai te tahi pahi ia ratou, e ua tae maira te tahi pahi Amerika, o "West Fa-

ralon'' te i'oa, mai te rave mai i te mau taata'toa no nia mai i te pahi atihia. I muri a'era, ua mou roa te pahi i te auahi, e tomo roa ihora i roto i te miti.

I te 6 no te avae Novema i mairi iho nei, ua tupu te haruru gas e te auahi i roto i te hoê apoo arahu i te fenua ra i Pesavenia, i Amerika, a rave noa'i te mau taata e rave rahi i te ohipa i reira. Ua tapea-noa-hia te mau taata rave ohipa i raro i te fenua, e te tamata noa ra e hoê tausani taata i te faaora ia ratou. I muri a'era, ua roaa mai na tino pohe e hoê hanere e tiahapa, e e rave rahi tei ino roa, e tei afaihia'tu i te fare ma'i.

Te Mau Mea Maere.

Ua riro te rê i te taata ra ia R. L. Maughan, no te fenua ra Utaha, i Amerika, no te faatereraa i to'na pahi reva i roto i te avae Atopa i mairi a'enei. Ua tamata oia i te puai o to'na pahi reva, e ua oti ia'na e piti hanere aore ahuru ma ono maile i te hora hoê. E mea tere hoi.

I roto i te avae Atopa i mairi a'enei, ua faatere o loane Macready raua o Oakley Kelly i te hoê pahi reva i te fenua ra Tarafonia i Amerika. E mai te haamataraa o te maneraa'tu e tae noa'tu i te ho'iraa mai tei te reva raua i na hora e toru ahuru ma pae; e aita e hoê faaearea ia pau roa a'era to raua gasoline e 690 galona.

Na te hoê uri i faaora te hoê taata e ta'na vahine i te fenua ra i Iowa i Amerika. A taoto ai raua i te pô, ua tupu te auahi i to raua fare, e haere atura te urî i to raua piha ma te aoa puai e te hohoni ia raua; ara a'era raua e haere vave atura i rapae.

Ua faauehia te hoê taata tari'a turi i te fenua ra i Tarafonia i Amerika ia haere na nia i te pahi reva ei faaoraraa i to'na turi. E ua tamata oia i te 10 no Atopa i mairi a'enei, e tae a'era oia i nia i te reva e 13, 000 avae te teitei; e ia ho'i maira oia i te fenua, parau maira oia, na ora roa.

O. B. PETERSON, Imprimeur, Rue Brea et de la
Rue Dumont d'Urville, Orovini, Papeete, Tahiti.